




Reykjavíkurborg
Skóla- og frístundasvið



Reykjavík, 16. október 2017
SFS2017030074
1.3.0

Ráðhús Reykjavíkur
Forsætisnefnd

Efni: Aðkoma ungmenna að ráðningu hlutastarfsmanna í félagsmiðstöðvum

Á fundi skóla- og frístundaráðs þann 11. október 2017 var lagt fram bréf borgarstjórans í Reykjavík, dags. 8. mars 2017, um tillögu Reykjavíkurráðs ungmenna um aðkomu ungmenna að ráðningu hlutastarfsmanna í félagsmiðstöðvum. Jafnframt lagt fram minnisblað sviðsstjóra skóla- og frístundasviðs, dags. 3. október 2017, varðandi tillöguna.

Lögð fram svohljóðandi tillaga Sigríðar Höllu Eiríksdóttur frá ungmennaráði Laugardals-, Háaleitis- og Bústaðahverfa:

Lagt er til að skóla- og frístundasvið leggi fram tillögur fyrir árslok 2017 um hvernig unglingar geti komið að og verið ráðgefandi við ráðningar hlutastarfsmanna í félagsmiðstöðvum borgarinnar.

Greinargerð fylgir.

Lögð fram svohljóðandi tillaga skóla- og frístundaráðsfulltrúa Samfylkingarinnar, Bjartar framtíðar, Vinstri grænna og Pírata:

Skóla- og frístundaráð leggur til að ungmenni, t.d. fulltrúar unglíngaráðs viðkomandi félagsmiðstöðvar, geti komið að gerð auglýsingar þegar auglýst er eftir hlutastarfsmanni í félagsmiðstöð. Jafnframt að fulltrúar unglíngaráðs geti lagt fram ósk um að ákveðnum spurningum verði beint til umsækjenda í ráðningarviðtali.

Tillagan var samþykkt.

Elínborg Una Einarsdóttir, Helena Sif Gunnarsdóttir og Hulda Valdís Valdimarsdóttir taka sæti á fundinum undir þessum lið.

Skóla- og frístundaráðsfulltrúar Samfylkingarinnar, Bjartrar framtíðar, Vinstri grænna og Pírata leggja fram svohljóðandi bókun:

Meirihluti skóla- og frístundaráðs þakkar ungmennaráðum framkomnar tillögur þeirra um starfsemi í þeirra þágu. Tillögurnar fjalla í fyrsta lagi um árlegan styrk til ungmenna til að hrinda eigin hugmyndum í framkvæmd, í öðru lagi um samræmdan opnunartíma félagsmiðstöðva sem verði opnar a.m.k. þrjú kvöld í viku og loks um aðkomu unglínginga að ráðningu hlutastarfsmanna í félagsmiðstöðvum. Tillögurnar eru afar frambærilegar og er

ljúft að geta samþykkt þær og komið þeim í skýran farveg. Við hvetjum ungmennaráðin í borginni til áframhaldandi góðrar vinnu við að gera starfsemi frístundamiðstöðva enn betri.


Áheyrnarfulltrúi framkvæmdastjóra frístundamiðstöðva leggur fram svohljóðandi bókun:

Áheyrnarfulltrúi framkvæmdastjóra frístundamiðstöðva þakkar fulltrúa ungmennaráðs Laugardals, Háaleitis og Bústaða fyrir tillöguna um aðkomu ungmenna að ráðningum hlutastarfsmanna. Að mörgu er að huga við ráðningar starfsmanna og mikilvægt að fylgja settum reglum og lögum. Framkvæmdastjórar vilja ávallt vera í góðu samráði og samstarfi við ungmenni og hafa væntingar til þess að tillaga skóla- og frístundasviðs muni auka aðkomu ungmenna að ráðningum starfsmanna.

Skóla- og frístundaráðsfulltrúar Sjálfstæðisflokksins og áheyrnarfulltrúi Framsóknar og flugvallarvina leggja fram svohljóðandi bókun:

Fulltrúar Sjálfstæðisflokksins þakka fulltrúum ungmennaráðanna fyrir góðar tillögur um árlegan styrk til ungmennaráða, þjónustutíma félagsmiðstöðva og aðkomu ungmenna að ráðningu hlutastarfsmanna í félagsmiðstöðvum. Ljóst er að vandað og metnaðarfullt starf á sér stað innan ungmennaráðanna og því er rétt að þeim sé gert kleift með árlegri styrkveitingu að hrinda hugmyndum í framkvæmd. Tekið skal undir það sjónarmið að framboð þjónustu félagsmiðstöðva sé sem jafnast milli hverfa borgarinnar. Þá er brýnt að finna leiðir til þess að ungmenni fái fleiri tækifæri til að segja álit sitt á þjónustu Reykjavíkurborgar, ekki síst í skóla- og frístundamálum.

Virðingarfyllst



Helgi Grímsson

sviðsstjóri skóla- og frístundasviðs

Hjálagt:

Greinargerð dags. 3. október 2017



Reykjavíkurborg
Skóla- og frístundasvið

Reykjavík, 3. október 2017
SFS2017030074
126. fundur
HG/sp

MINNISBLAÐ

Viðtakandi: Skóla- og frístundaráð

Sendandi: Helgi Grímsson, sviðsstjóri skóla- og frístundasviðs

Efni: Aðkoma ungmenna að ráðningu hlutastarfsmanna í félagsmiðstöðvum

Á fundi borgarstjórnar og Reykjavíkurráðs ungmenna þann 28. febrúar 2017 var lögð fram svohljóðandi tillaga Sigríðar Höllu Eiríksdóttur frá ungmennaráði Laugardals, Háaleitis og Bústaðahverfis:

Lagt er til að skóla- og frístundasvið leggi fram tillögur fyrir árslok 2017 um hvernig unglingar geti komið að og verið ráðgefandi við ráðningar hlutastarfsmanna í félagsmiðstöðvum borgarinnar.

Í greinargerð með tillögunni er lögð áhersla á að ungmenni komi að ráðningu hlutastarfsmanna í félagsmiðstöðum borgarinnar með ráðgefandi álit. Tekið verði tillit til skoðana og athugasemda ungmenna á einhverjum tímapunkti í ráðningarferlinu og að þau fái að sitja viðtöl með ráðningaaðilum. Með því móti geti þau tekið þátt í mótun frítímastarfs í sínu hverfi.

Skóla- og frístundasvið Reykjavíkurborgar hefur fjallað um tillöguna og leggur til að ungmenni, t.d. fulltrúar unglingaráðs viðkomandi félagsmiðstöðvar, geti komið að gerð auglýsingar þegar verið er að auglýsa eftir hlutastarfsmanni í félagsmiðstöð hverfisins og að fulltrúar unglingaráðs geti lagt fram óskir um að ákveðnum spurningum verði beint til umsækjenda í ráðningaviðtali. Varðandi þann hluta tillögunnar að ungmenni sitji í ráðningarviðtölum við umsækjendur leggst skóla- og frístundasvið gegn því bæði með hag ungmenna og umsækjenda að leiðarljósi. Ungmennin eru ólögráða og ekki við hæfi að leggja slíka ábyrgð á herðar þeirra. Einnig er starfið í félagsmiðstöð þess eðlis að starfsmaður þar þarf að taka á ýmsum málum sem koma upp, s.s. neyslu og agamálum, og því óeðlilegt að starfsmaður sé í einhvers konar ráðningarsambandi við ungmenni sem sækja félagsmiðstöðina.